

Headlines

- जम्मू-कश्मीर गी राज्य दा दर्जा बहाल करने दी मंग गी लेइए मंत्रीमंडल नै इक्क प्रस्ताव पास कीता ऐ।
- मुखमंत्री उमर अब्दुल्ला होरें जम्मू डिविजन ते कश्मीर डिविजन दे बरोबर विकास पर जोर पाया ऐ।
- उपराज्यपाल मनोज सिन्हा ते मुखमंत्री उमर अब्दुल्ला होरें शोपियां च इक प्रवासी मजदूर दी हत्या दी निंदा कीता ऐ। पुंछ च पोलीस नै इक आतंकवादी नेटवर्क दा पर्दाफाश कीता।
- क्रिकेट च बंगलोर च जारी टेस्ट मैच च न्यूजीलैंड दी टीम गी जित्त लेई 107 रन्जें दी लोड ऐ, जदकि मैच दा इक गै दिन अजें बाकी ऐ।

<><><><><><>

ते हुन खबरें दी तफसील कन्नै राजेश मंसोत्रा।

JK-Statehood

जम्मू-कश्मीर मंत्रीमंडल नै राज्य दा दर्जा बहाल करने दी केंद्र सरकार अगगे मंग गी लेइये इक प्रस्ताव पास कीता ऐ। मुखमंत्री उमर अब्दुल्ला हुंदी अगुवाई च मंत्रीमंडल नै वीरवारें जम्मू-कश्मीर दा पुराना राज्य दा दर्जा बहाल करने दी मंग गी लेइये इक्क प्रस्ताव पास कीता। मंत्रीमंडल नै मुखमंत्री होरें गी प्रधानमंत्री ते भारत सरकार कन्नै एह मुद्दा पुट्टने दा इख्तेयार दित्ता ऐ। इक सरकारी प्रवस्ता मुजब मुखमंत्री होरें औने आहले दिनें च नमीं दिल्ली जाइए प्रधानमंत्री ते केंद्री मंडल कन्नै इस मामले पर मलाटी करडन। मंत्रीमंडल नै नवंबर 2024 गी श्रीनगर च विधानसभा दा सत्र लाने दा फैसला कीता ते उपराज्यपाल होरें गी सलाह दित्ती जे विधानसभा गी सहिए संबोधित करन। मुखमंत्री उमर अब्दुल्ला होरें अपनी इक सोशल मीडिया पोस्ट च पुष्टि कीती जे धारा 370 विधायिका दे कार्यक्षेत्र च ऐ जदकि राज्य दा दर्जा बहाल करने दी मंग सरकार दे कार्यक्षेत्र च ऐ।

<><><><><><>

CM-Jammu

मुख्यमंत्री उमर अब्दुल्ला होंरें अपने दफ्तरै दा कम्मकाज साम्भने परेंत अज्ज पैहली बारी जम्मू दा दौरा लाया ते लोकें दे मसले हल करने दी अपनी बचनबद्धता गी फही पक्का कीता। आकाशवाणी दे जम्मू जिला संवाददाता अंकुश शर्मा मूजब, जम्मू दे शेर-ए-कश्मीर भवन च अपने भाषण दौरान उमर अब्दुल्ला होंरें लोकें गी यकीन दोआया जे उंदी अवाजें गी सुनेआ जाग ते उंदे पर कार्रवाई बी पक्क गै होग। प्रदेश दे दौनें खित्तें दे इक बरोबर विकास बारै गल्ल करदे होई उमर होंरें आखेआ।

<><><><><><>

Speaker-Oath

उपराज्यपाल मनोज सिन्हा होंरें सीनियर नेशनल कांफ्रेंस नेता मुबारक गुल होंरें गी जम्मू-कश्मीर विधानसभा दे अंतरिम स्पीकर दी सगंध चुकाई। मुबारक गुल होंरें श्रीनगर दी ईदगाह सीट थमां चुनां जित्तेआ ऐ। राजभवन श्रीनगर च अज्ज इक समारोह च उनेंगी सगंध चकाई गेई। मुख्यमंत्री उमर अब्दुल्ला, उपमुख्यमंत्री सुरिंद्र चौधरी ते कैबिनेट मंत्री सकीना इत्तू, जावेद डार, जावेद राणा ते सतीश शर्मा होर इस मौके पर मौजूद हे। मुबारक गुल होर नमें चुनोए दे विधानसभा मैम्बरें गी मगरा सगंध चुकाडन।

<><><><><><>

JMC-Portal

जम्मू नगर निगम नै नमीं सार्वजनिक शिकायतें ते फीडबैक प्रबंधन वरबन्धी प्रणाली ऑनलाइन वेब ते टोल फ्री नम्बरें गी जारी कीता ऐ तां जे लोकें दी शिकायतें ते उंदे समेंसिर निपटारे गी यकीनी बनाया जाई सकै। जेएमसी कमीश्नर डॉक्टर देवांश यादव होंरें अज्ज नमां पोर्टल जारी कीता। अधिकारिक सूचना मूजब आम लोक जेएमसी दी वेबसाइट पर जाइयै या टोल फ्री नंबर 18001807207 पर अपनी शिकायतें या मंगें गी दर्ज करी सकदे न। नमीं प्रणाली गी बेहतर जीआईएस तकनीक ते डिजिटल डोर नंबर कन्नै जोड़ेआ गेदा ऐ। इदे राएं डेंगू ते चिकनगुनिया दी शिकायतें गी बी दर्ज कीता जाई सकदा ऐ।

<><><><><><>

Reasi-Bike

औंदी 21 अक्तूबर गी मनाए जाने आहले राश्ट्रीय पुलस दिवस दे सरबंधै च अज्ज जिला पुलस रियासी पास्सेआ देसै लेई सर्वोच्च बलिदान देने आहले बहादुर अफसरें ते जवानें गी श्रद्धांजलि देने दे मकसद कन्ने इक बाईक रैली दा आयोजन कीता गेआ। आकाशवाणी दे रियासी जिला संवाददाता देवेन्द्र ठाकुर दी रिपोर्ट मूजब, शहीदें प्रति आभार प्रगट करदे होई नीले रंगे दे रिबन ते झंडे लेइयै मोटरसैकल सोआर कस्बे दे बक्ख-बक्ख हिस्सें चा होइयै लंग्घे जित्थे लोकें ताड़ियां बजाइयै उंदा अभिवादन कीता। रियासी दे एडिशनल एस.पी इफ्तिखार अहमद होरें इस रैली दी अगुवाई कीती। इस मौके पर स्हाड़े संवाददाता कन्नै गल्ल करदे होई उनें आखेआ।

<><><><><><>

NCW

विजया रहाटकर होरें गी राश्ट्री महिला आयोग दी अध्यक्ष नियुक्त कीता गेआ ऐ। महिला ते बाल विकास मंत्रालय नै इस सरबंधै च अधिसूचना जारी करी दिती ऐ। विजया रहाटकर होर महाराश्ट्र महिला आयोग दिएं अध्यक्ष ते औरंगाबाद दी मेयर दे तौर पर कम्म करी चुकी दिआं न। उनें भारती जनता पार्टी दी राश्ट्री सचिव ते पार्टी दी महिला शाख दी प्रधान दे तौर पर बी कम्म कीते दा ऐ। मंत्रालय नै राश्ट्री महिला आयोग दिएं सदस्य दे तौर पर डॉक्टर अर्चना मजूमदार हुंदी नियुक्ति दी अधिसूचना बी जारी कीती ऐ।

<><><><><><>

Kashmir-Killing

उपराज्यपाल मनोज सिन्हा ते मुख्मन्त्री उमर अब्दुल्ला होरें शोपियां जिले च इक प्रवासी मजदूर दी हत्या दी निंदेआ कीती ऐ। उप-राज्यपाल होरें एक्स पर लिखेआ जे पूरा देश सोगी परिवार दे कन्नै ऐ ते सुरक्षाबल इत्यारे आतंकवादिएं गी तुप्पी कडडन। मृतक अशोका चौहान बिहार दा रौहने आहला हा। मुख्मन्त्री उमर अब्दुल्ला ते घाटी दे राजनीतिक दलें बी इस हत्या दी निंदेआ कीती ऐ। उनें आखेआ जे दपक्खी कश्मीर च आतंकवादिएं हत्या अशोक चौहान दी हत्या बड़ी दुखदायी ऐ। जम्मू-कश्मीर प्रदेश कांग्रेस कमेटी दे प्रधान तारिक हमीद कर्रा होरें बी इस हत्या गी अफसोसनाक ते दुखदायी दस्सेआ ऐ।

<><><><><><>

Poonch-Arrest

पुलसै पुंछ जिले थमां जम्मू-कश्मीर गजनवी फोर्स दे दऊं हाईब्रिड आतंकवादिएं ते ओवर ग्राउंड वर्कें गी गिरफ्तार कीता ऐ। उन्दे कब्जे शा हत्थगोले ते थेहार बरामद कीते ग ना। आकाशवाणी दे पुंछ जिला संवाददाता अनुभव मिसरी मूजब जिला पुलस लाईन्स पुंछ च इक संवाददाता सम्मेलन गी संबोधित करदे होई पुलस दे अतिरिक्त महानिदेशक आनंद जैन होरें दस्सेआ जे इनें 2 ओवर ग्राउंड वर्कें दी गिरफ्तारी कन्नै जिले च आतंकवाद गी बड्डा झटका लग्गा ऐ। उनें आखेआ।

<><><><><><>

Samba-Agriculture

राई-बाई दे पूरे-पराते विकास सरबन्धी कार्यक्रम HADP दे मिशन डरैक्टर राहुल यादव होरें अज्ज विजयपुर साम्बा च फलें दे बूहटे आहली नर्सरी दा दौरा लाया ते विभाग पास्सेआ तोढ चाढी जा'रदी गतिविधिएं दा जायजा लैता। इस मौके पर आकाशवाणी कन्नै खास गल्लबात करदे होई राहुल यादव होरें आखेआ।

<><><><><><>

Udhampur-BSF

उधमपुर च बीएसएफ दे Subsidiary Training Centre च अज्ज नमें रंगरूटें दी पासिंग आउट परेड होई जेदे च सिखलाई पूरी करने आले रंगरूटें कैडटें हिस्सा लैता। आकाशवाणी संवाददाता अचिन दूबे कन्नै गल्लबात च बीएसएफ दे आई.जी.पी राजेश कुमार होरें मती जानकारी दिती।

<><><><><><>

Cricket

ब्रेगलुरु च मजूदा श्रृंखला दे पैहले क्रिकेट टेस्ट मैच च भारत नै न्यूजीलैंड गी जित्त लेई 107 रन्जें दा लक्ष्य दित्ता ऐ। मैच दे अज्ज चौथे दिन भारत नै अपनी दुई पारी च 462 रन्ज बनाए। पैहली पारी दे आधार पर 356 रन्जें थमां पिच्छे होई जाने दे बाद भारत नै 106 रन्जें दी बढत हासल कीती। भारत दी तरफा सरफराज खान नै 150 रन्जें दी पारी खेड्डी जदकि विकेटकीपर बल्लेबाज ऋषिभ पंत शतक बनाने दा खुंजी गे ते 99 रन्हें पर आउट होए। इनें दौनें बल्लेबाजें चौथे विकेट लेई 177 रन्ज बनाए। न्यूजीलैंड दी तरफा मैट हैनरी ते विलियम नै 3'3 विकेट

लैते। भारत नै पैहली पारी च 46 ते न्यूजीलैंड नै 402 रन्ज बनाए हे। न्यूजीलैंड गी हुन कल टेस्ट मैच दे अखीरले दिन जित्त लेई 107 रन्ज बनाने होङ्गन। उआं अज्जै दा खेड्डु खराब रोशनी करी रोकना पेई गोआ।

<><><><><><>

Kashmir-Marathon

अंतरराष्ट्री सतह दे मन्ने-परमन्ने दे धावकें सने 2 जहार शा मते एथलीट कल आयोजित होने आहली पैहली-पैहली कश्मीर अंतरराष्ट्री मैराथन च हिस्सा लैङ्गन। पर्यटन विभाग कश्मीर दे डरैक्टर राजा याकूब फारूक होरें गलाया ऐ जे इस आयोजन दा मकसद दुनिया गी एहू दस्सना ऐ जे घाटी च कनून बवस्था दी स्थिति च बड़ा मता सुधार होए दा ऐ। इस मैराथन द्रौड़ च 13 मुल्खें दे 59 धावकें सनें देसै दे बक्ख-बक्ख राज्यें ते केंद्र शासित प्रदेशें थमां बी मन्ने-परमन्ने दे एथलीट हिस्सा लैङ्गन। एहू मैराथन द्रौड़ दऊं श्रेणिएं पर किलोमीटर दी फुल मैराथन ते 21 किलोमीटर दी हाल्फ मैराथन आली श्रेणिएं च आयोजित कीता जाग।

<><><><><><>